



PRÆFATIO. LECTORI BENEVOLO SALUTEM.



Ihil in omni re literaria laboriosius est , quam Genealogicum Studium , quod magnam in conquirendis antiquis monumentis requirit industriam , adhæc , non mediocrem historiarum cognitionem & denique , quod omnium primum est , in promerenda apud doctos fide , sinceræ & solidæ veritatis curam . Non enim satis est pro lubitu adferre nomina undecunque congesta , sed singula requirunt probationes per authentica instrumenta , vel ad minimum per veterum Authorum de adulazione non Suspectorum clara testimonia . Quamobrem nonnullis ætatis nostræ Genealogicis Scriptoribus consultius fuisse , abstinere ab omni opere , quam adeo multa sine Consule , sine Prætore , quod ajunt , asleverare .

Mihi quidem in animum nunc non venit , Genealogias solidas conscribere , qui labor à me alienissimus semper fuit . Sed cum in promtu habuerim , Collectanea Genealogica ex Archivo Instructissimo Inclitorum Austriz Inferioris Statuum , quod prope Quater Mille Documenta in Membranis exarata complectitur , desumpta , missis Familiis , jam fato suo functis , ad illas solum animum appuli , quæ hodienum superstites florent . Collegi itaque ea omnia , quæ de illis memoriæ prodita erant , relicturus jam peritioribus laborem , integras justasque Geneles collatis his fragmentis cum aliis Gentium illarum monumentis , contexendi .

Interea hæc qualiacunque fortasse alicui usui erunt , ad Familiarum hoc opusculo contentarum notitiam consequendam .